
YANGI O'ZBEKISTON-HUQUQIY DEMOKRATIK DAVLAT



YaNGI O'ZBEKISTON-huquqiy demokratik davlat

Xalqimiz konstitutsiyaviy islohotlardan katta o'zgarishlar kutmoqda. Loyiha bo'yicha o'tkazilgan umumxalq muhokamasi jarayonida aholidan **220 mingdan ziyod takliflar** kelib tushganligi ham fuqarolarimiz ushbu masalaga juda katta qiziqish va e'tibor bilan yondashganligidan yaqqol dalolat beradi.

Konstitutsiyaviy qonun loyihasi ustida ishlashda senatorlarimiz ham faol ishtirok etdilar. Xususan, **19 nafar** senatorlarimiz Konstitutsiyaviy komissiya tarkibida Konstitutsiyaviy qonun loyihasi ustidagi ishlarda **bevosita** qatnashdilar.

Xabaringiz bor, Konstitutsiyaviy qonun loyihasi umumxalq muhokamasida, yetuk olimlar, jamoatchilik, xalqaro va xorijiy ekspertlar ishtirokidagi muhokamalarda har tomonlama tahlil qilindi va maromiga yetkazildi.

Xususan, loyihani tayyorlashda va takomillashtirishda **400 dan** ortiq xalqaro hujjatlar, **190 ga** yaqin mamlakatlar konstitutsiyalari puxta o'rganildi, **xalqaro ekspert va mutaxassislar** ishtirokida bir necha bor muhokama qilindi, shuningdek, respublikaning turli hududlarida keng jamoatchilik vakillari ishtirokida jami **20 mingga** yaqin muhokamalar tashkil etildi.

Loyiha **10 ga** yaqin xorijiy va xalqaro ekspertizalardan, shu jumladan, **lingvistik, yuridik, gender-huquqiy, korruptsiyaga qarshi, jamoatchilik** hamda **inson huquqlari** bo'yicha normalarga muvofiqligi yuzasidan ekspertizalardan o'tkazildi. Xalqaro ekspertlar ham loyiha **xalqaro huquqning umume'tirof etilgan barcha qoidalarini** o'zida mujassam etganligini e'tirof etdilar.

Joriy yil 10 - **martida Qonunchilik palatasi** majlisi o'tkazilib, unda Konstitutsiyaviy qonun loyihasi bo'yicha **referendumni tayinlash** va uni **o'tkazish** to'g'risida **qaror** qabul qilindi.

Shu o'rinda Konstitutsiyaviy qonun loyihasining mazmun-mohiyati va eng asosiy, muhim jihatlariga qisqacha to'xtalib o'tsam.

Loyihada mamlakatimizning uzoq muddatli taraqqiyot strategiyalari, yurtimiz va xalqimizning ertangi farovon hayoti uchun mustahkam huquqiy asos hamda ishonchli kafolatlar o'z ifodasini topmoqda. O'zbekiston **"huquqiy davlat"** degan konstitutsiyaviy tamoyil muhrlanmoqda.

Bu barchaning qonun oldida tengligini va qonundan xech kim ustun emasligini ta'minlash, sudlar tomonidan adolatli qarorlar qabul qilish, umuman olganda **davlat organlarining xalqqa xizmat qilishi** uchun mustahkam poydevor bo'ladi.

Yangi tahrirdagi Konstitutsiyamiz ilgari amal qilib kelgan "davlat - jamiyat - inson" tamoyilini **"inson - jamiyat - davlat"** deb o'zgartirish, ya'ni eng avvalo inson manfaatini har narsadan ustun qo'yishni maqsad qilgan.

Xususan, unda **inson huquq va erkinliklarini ta'minlash - davlatning oliy majburiyati** etib belgilanmoqda va shu munosabat bilan inson huquqlari kafolatlari jiddiy ravishda kuchaytirilmoqda.

Loyihaga asosan insonning sha'ni va qadr-qimmatini daxlsizdir, hech narsa ularni kamsitish uchun asos bo'lishi mumkin emas. **Insonning huquq va erkinliklari bevosita amal qiladi** hamda qonunlar, davlat organlari va mansabdor shaxslar faoliyatining mazmun-mohiyatini belgilab beradi.

Inson va davlat organlari o'rtasidagi yuzaga kelgan **noaniqliklar inson foydasiga talqin qilinishi**, huquqiy ta'sir choralari maqsadga erishish uchun **etarli va mutanosib bo'lishi** kerakligi belgilanmoqda. Bu normalar huquqni qo'llash faoliyatida **inson manfaatlari ustuvor bo'lishini** amalda ta'minlashga xizmat qiladi.

Shuningdek, har bir inson **o'z shaxsini erkin kamol toptirish huquqiga** egaligi, qonunchilikda belgilanmagan majburiyat **hech kimning zimmasiga uning roziligsiz yuklatilishi**, O'zbekiston

fuqarosi mamlakatdan tashqariga chiqarib yuborilishi yoki boshqa davlatga berilishi mumkin emasligi belgilanmoqda.

Jinoyat protsessida inson huquqlari kafolati eng ilg'or xalqaro standartlarga muvofiq kuchaytirilmoqda. Xususan, shaxsni sud qarorisiz **48 soatdan ortiq muddat ushlab turilishi mumkin emasligi, ("Xabeas korpus" instituti)** hamda shaxsni ushlab turish chog'ida **uning huquqlari va ushlab turilishi asoslari unga tushunarli tilda tushuntirilishi** kerakligi **("Miranda qoidalari")** belgilanmoqda.

Ushbu huquqiy kafolatlar inson huquqlarini muhofazasini kuchaytirish sohasidagi ishlarni **mutlaqo yangi bosqichga** olib chiqadi hamda ularni davlat organlarining suiste'molliklaridan ishonchli himoya qiladi, shaxsiy erkinlik daxlsizligini va insonlarni noqonuniy hibsga olishga yo'l qo'ymaslikni kafolatlaydi.

Sh.Abdullayev - fuqarolik ishlari bo'yicha So'x tuman sudi raisi

[Bizni ijtimoiy tarmoqlarda kuzating](#)

[Facebook](#) | [Telegram](#) | [Telegram murojaat](#) | [Youtube](#) | [Instagram](#)

2023-03-24 10:03:50